

आकाशवाणी

खबरां ---

1 लोकसभा चुनाएं दे 7में ते खीरले मरहले तैहत मतदान सम्पन्न होई गेआ ऐ, शामी 5 बजे तगर 58 प्रतिशत शां बद्द मतदान दर्ज कीता गेआ ऐ।

2. पाकिस्तान सरकार नै एह कबूल कीता ऐ जे पाकिस्तान दे कब्जे आहला कश्मीर इक विदेशी इलाका ऐ।

3 फिलिपीन्स दे राष्ट्रपति नै आखेआ ऐ जे उंदी सरकार खेत्तरीय स्थिरता आस्तै भारत कन्नै सरबंध होर मजबूत करोग।

4 भारतीय मौसम विभाग नै उत्तर पच्छिम ते मध्य भारत च गर्मी थमां किश राहत थहोने दी पेशनगोई कीती ऐ।

5 भाला सुट्टने दे मुकाबले च भारत दे डी.पी मनु नै ताईवान एथलेटिक्स ओपन 2024 च अज्ज सुन्ने दा तगमा हासिल कीता ऐ।

<><><><><><><>

7th Phase Voting

लोकसभा दे 7में ते अखीरले चरण दे चुनां तैहत 7 राज्यें ते 1 केंद्र शासित प्रदेशें दिएं 57 संसदीय सीटें लेई अज्ज वोट पाए जा करदे न। इंदे च वाराणसी संसदीय सीट बी शामिल ऐ जित्थुआं प्रधानमंत्री नरेंद्र मोदी होर चुनां लड़ा करदे न। पंजाब दिएं 13 सीटें, हिमाचल प्रदेश दिएं 4, उत्तर प्रदेश दिएं 13, पच्छिम बंगाल दिएं 6, बिहार दिएं 8, ओडिशा दिएं 6, झारखंड दिएं 3 ते चंडीगढ़ दी 1 सीट लेई अज्ज मतदान होआ करदा ऐ। एहदे अलावा ओडिशा दिएं 42 असंबली सीटें ते हिमाचल प्रदेश दिएं 6 असंबली सीटें लेई बी अज्ज गै वोट पाए जा रदे न। 10 करोड़ 6 लख शा मते योग्य मतदाता इस चरण च चुनां मैदान च खड़ोते दे कुल 904 मेदवारें दे सियासी भविक्ख दा फैसला अज्ज करै करदे न। खीरी जानकारी थोने तगर संझा 5 बजे तगर 58 प्रतिशत मतदान दर्ज करी लैता गेदा हा। एहदे शा पैहले प्रधानमंत्री ते बीजेपी दे वरिष्ठ नेता नरेंद्र मोदी होरें लोकें गी अपील कीती जे ओह् बधी चढ़ियै लोकतंत्र दे इस महापर्व च शामिल होन ते पक्क गै मतदान करन। उनें मेद जाहिर कीती जे महिला ते युवा मतदाता रिकार्ड गिनतरी च वोट पाने दे अपने हक्का दा इस्तेमाल

करडन। श्री मोदी हों लोके गी गुजारश कीती ऐ जे ओह मतदान दे
राहें भारत दे लोकतंत्र गी मता मजबूत ते समृद्ध बनान।

<><><><><><>

Pakistan-POJK

पाकिस्तान सरकार नै इस्लामाबाद हाईकोर्ट च एह कबूल कीता ऐ जे
पाकिस्तान दे कब्जे आहला जम्मू-कश्मीर इक विदेशी इलाका ऐ।
पाकिस्तान दे अप्पर अजार्नी जनरल नै अदालत गी दस्सेया जे
कश्मीरी शायर ते पत्रकार अहमद फरहद शाह पाकिस्तान दे कब्जे
आहले कश्मीर चि हिरासत च न ते उनेंगी इस्लामाबाद हाई कोर्ट च
पेश नेई कीता जाई सकदा की जे पाकिस्तान दे कब्जे आला इलाका
विदेश जमीन ऐ ते ओह पाकिस्तान दे अख्तियार हेठ नेई ऐ। अदालतै
च शाह हुंदी घरै आहली दी याचिका पर सुनवाई होआ करदी ही। शाह
हों गी पाकिस्तान दी खूफिया एजेंसिएं रावलपिंडी च उंदे घरै थमां
अगवाह करी लैता हा। शाह होर पिच्छले दऊं हफतें शा लापता न ते
हाल च गै पता लग्गा ऐ जे पुलस नै पाकिस्तान दे नजैज कब्जे आले
कश्मीर च उंदे खलाफ दऊं मामले दर्ज कीते न। इस्लामाबाद हाई कोर्ट
नै पुच्छेया जेकर पाकिस्तान दे कब्जे आला कश्मीर विदेशी इलाका ऐ
तां पाकिस्तानी फौज ते रेंजर उत्थे किस चाली पुज्जे। हाई कोर्ट दे

जज मोहसिन अख्तर नै पाकिस्तानी एजेंसिं दी सख्त निंदा बी कीती।



Phillipine President Statement

फिलीपीन्स दे राष्ट्रपति फर्डिनेज मार्कोस जूनियर नै आखेआ ऐ जे उंदी सरकार खेत्तीय स्थिरता आस्तै भारत, दक्खन कोरिया ते होरनें मित्रोचारी आहले देशे कन्ने सरबंध मजबूत करोग। कल रातीं शांगरिला गल्लबात आहले सत्र च उनें फिलीपीन्स दे हित च बड्डे द्वीप समूह सुरक्षा अवधारण दे तैहत सुरक्षा सरबंध मजबूत करने पर जोर भरेया ऐ। उनें इक बरोबर विचारधारा आहले देशे थमां सांझी पैहल दे जरिये खेत्तीय स्थिरता बनाई रखने आस्तै सांझे जत्नें दी अपील कीती ऐ। इस बरे अप्रैल च फिलीपीन्स नै भारत कन्ने 2022 च होए दे 37 करोड़ 50 लक्ख डालर दे समझौते दे तैहत ब्रहमोस सुपरसोनिक क्रूज मसाइलां हासल कीतियां हियां।



India Bloc Meeting

मंगलवारें लोकसभा चुनाएं लेई वोटें दी गिनतरी होग, एहदे थमां पैहले आई.एन.डी.आई गठबंधन नमीं दिल्ली च इक बैठक करा'रदे न तां जे

ओह अपनी भविष्य आस्तै रणनीति दी योजना बनाई सकन। एह बैठक कांग्रेस दे अध्यक्ष मल्लिकार्जुन खड़गे हुंदे घर कीती गई। कांग्रेस दी वरिष्ठ नेता सोनिया गांधी ते राहुल गांधी, एन.सी.पी दे शरद पवार, समाजवादी पार्टी दे अध्यक्ष अखिलेश यादव, दिल्ली दे मुखमंत्री अरविंद केजरीवाल, जे.जे.एम दे वरिष्ठ लीडर ते ते झारखंड दे मुखमंत्री चम्पाय सोरेन, सी.पी.आई दे जनरल सैक्रेटरी सीतारमन चयुरी ते आर.जे. डी दे नेता तेजस्वी यादव होर इस बैठक च हिस्सा लेता। शिव सेना दे अनिल देसाई, डी.एम.के दे टी.आर बालू ते नेशनल काँग्रेस दे फारूक अब्दुल्ला होर बी इस बैठक च मौजूद हे। टी.एम.सी ते पी.डी.पी नै बैठक च हिस्सा नई लैता। उआं कांग्रेस नै अज्ज संझा,लै टी.वी चैनलें पर लोकसभा दे कुसै बी एग्जिट पोल सरबन्धी बैहस च हिस्सा नई लैने दा फैसला लैता ऐ। पार्टी दे प्रवक्ता पवन खेरा होरें आखेआ ऐ जे उंदी पार्टी छड़ी टी.आर.पी आस्तै कुसै बी अंदाजे लाने आहली होइ च शामिल नई होना चाहंदी। बी.जे.पी दे अध्यक्ष जे.पी नड्डा होरें आखेआ ऐ जे कांग्रेस पार्टी दा एह फैसला इस गल्लै दी पुष्टि करदा ऐ जे उनें लोकसभा चुनाएं च हार गी स्वीकार करी लैता ऐ।

<><><><><><>

Eve IMD Weather

मौसम विभाग नै अगले दऊं दिनें च देशे दे उत्तर पच्छम मध्य पूर्वी हिस्सें च जारी गर्मी दे प्रकोप थमां किश राहत थोने दी मेद बुज्झी ऐ। विभाग नै आखेआ ऐ जे हरियाणा, दिल्ली, पंजाब, राजस्थान, उत्तर प्रदेश, ओडिशा, बिहार, मध्य प्रदेश, छत्तीसगढ़, उत्तराखंड, आंध्र प्रदेश ते झारखंड च अज्ज गर्मी दी स्थिति बरोबर जारी रौहंग। मौसम विभाग नै आख्ेआ ऐ जे अगले दऊं दिनें दौरान देशे दे उत्तरी पच्छमी ते मध्य हिस्सें च तापमान च दो थमां त्रै डिग्री सैल्यिस ते पूर्वी हिस्से च त्रै थमां चार डिग्री सैल्यिस दी कमी आई सकदी ऐ। आकाशवाणी खबरें कन्नै गल्ल करदे होई मौसम विभाग दे वैज्ञानिक डॉ. आर.के जेनामनी होरें आखेआ ऐ जे मौसम विभाग नै पंजाब, हरियाणा ते उत्तर प्रदेश च ओरेंज अलर्ट जारी कीता ऐ। इनें इलाकें च तापमान 44 थमां 46 डिग्री तगर पुज्जी सकदा ऐ। जेनामनी होरें दस्सेया ऐ जे पच्छम इलाकें च गड़बड़ी दे चलदे गर्मी शां किश राहत थोग ते भारत दे उत्तरी पच्छमी इलाकें च बिजली चमकने दे कन्नै-कन्नै बरखा बी होग।

<><><><><><>

Weather

मौसम विभाग नै आखेआ ऐ जे जम्मू संभाग च बने दे जबरदस्त गर्मी आले हालात अगले किश दिनें दौरान बराबर जारी रौहने दे असार न। जम्मू च अज्ज दिनें दा बद्दोबद्द तापमान 42.9 डिग्री सैल्यिस ते कल रातीं दा घट्टोघट्ट तापमान 30.1 डिग्री सैल्यिस दर्ज कीता गेआ। पैहले जारी कीती गेदी सलाह गी फही दोहरांदे होई मौसम विभाग नै आखेआ ऐ जे इनें दिनें वायुमंडल च यू.वी रेडीएशन दी तीव्रता बड़ी मती ऐ इस करियै दपैहरी 12 बजे शां 3 बजे तगर बाहर जाने कोला परहेज करना लोड़चदा ऐ। मैहकमे नै लोकें गी एह सलाह बी दिती ऐ जे ओह मता जरूरी होने पर गै दिन दे बेल्ले बाहर निलन ते बाहर जाने आस्तै हल्के रंगे दे टल्ले लान ते पान दी बोतल बी पक्क गै कन्नै रक्खन।



Javelin

भाला सुट्टने दे मुकाबले च भारत दे डी.पी मनु नै ताईवान एथलेटिक्स ओपन 2024 च अज्ज 81 इशारिया 5-8 मीअर दी दूरी तगर भाल सुट्टियै सुन्ने दा तगमा हासल कीता ऐ। 81 इशारिया 5-8 मीटर दे इस शानदार प्रदर्शन कन्नै डी.पी मनु होर पैहली थाहरै पर

रेय। चीन दे चाओ सुन चेंग नै चांदी दा तगमा जितेआ जिसलै के चीन दे गै चाओ हांग हुआंग नै 71 इशारिया 2-4 मीटर दी दूरी पर भाला सुट्टियै केंह दा तगमा अपने नां कीता। इस मुकाबले च हिस्सा लैने आले कुल 12 प्रतिभागिएं चा भारत दे डी.पी मनु गै इक्कलै विदेशी प्रतिभागी हे। उआं डी.पी मनु लेई अजें बी पेरिस ओलंपिक लेई अपने आप क्वालीफाई करने गितै 85 इशारिया 5-0 मीटर दा निशाना हासल करना अजें बकाया ऐ।

<><><><><><>

Amarnath-Yatra

केंद्र शासित प्रदेश जम्मू-कश्मीर दी सरकार सुरक्षा एजेंसियां ते होर दुए सरबंधत धड़े 29 जून गी शुरू होने आहली श्री अमरनाथ जातरा लेई पूरे जोरें-शोरें कन्नै तैयारियां करा रदे न। जम्मू-कश्मीर सरकार नै इस बरे दी श्री अमरनाथ जातरा लेई जम्मू-कश्मीर प्रशासनिक सेवा जे.के.ए.एस दे 57 अफसरें गी बतौर कैंप डरैक्टर्स ते अडिशनल कैंप डरैक्टर तैनात कीता ऐ। तोआई जातरा गी यात्रुएं लेई रमानदारी आहला बनाने लेई राष्ट्रीय आपदा प्रतिक्रिया बल एन.डी.आर.एफ नै चंगी चाल्ली प्रशिक्षित अपने 00 जवानें जिंदे च महिला सैनिक बी

शामल न गी पिछले ढाई म्हीने थमां उधमपुर च लोड़चदी सिखलाई देआ रदा ऐ।

<><><><><><>

LG-Vote

उपराज्यपाल मनोज सिन्हा होंरें अज्ज उत्तर प्रदेश दी बल्लिया चुनावी हल्के दे महानपुर गां थमां अपना वोट पाया ऐ। एल.जी होंरें सोशल नेटवर्किंग साईट-एक्स राएं लोकें गी अपने वोट पाने दे अधिकार दा इस्तेमाल करने ते लोकतंत्र गी मजबूत बनाने दे कम्म च बधी चढ़िये अगगे औने दी अपील बी कीती।

<><><><><><>